


*Sr. Clyde Harms***ORANJESTAD**

Humamento den sitio publico ainda ta un problema na Aruba. Mientras cu na Spaña for di dia 2 di januari ultimo, gobierno a reforsa su ley anti-tabaco cu ta prohibi radicalmente humamento den sitionan publico cera. E ley aki ta prohibi tambe e consumo di sigaria of tabaco den parke infantil, y cerca di

Sr. Clyde Harms

Mester reforsa prohibicion di humamento den luganan publico

centro escolar y di hospital.

Aki na Aruba 12 aña despues gobierno a introduci un medida pa evita e humamento den sitionan publico, pero ainda ta falta hopi pa conscientisa nos hendenan riba e problematica di humamento den sitio publico y su impacto pa salud di hende.

Sr. Clyde Harms cu a bin cu e iniciativa aki tempo cu Dr. Ike Posner tabata minister di Salubridad Publico. Aunke

e ta satisfecho cu un medida anti-tabaco a ser introduci mas cu un decada pasa, mester reforsa esaki debidamente. Asina sr. Clyde Harms a bisa durante un declaracion duna ayera na Bon Dia Aruba

Prome cu e medida a ser adopta, el a yega di manda varios carta na Gobierno di e tempo aya pa stop e propaganda di humamento den programa di muchanan. Pero nan tabata palabranan cu inicialmente a bay perdi. “Mi pleito no tabata contra

humamento. Mi pleito tabata ta cu humamento ta un decision individual pero mester tin respet pa otro vooral pa mucha”, segun sr. Clyde Harms.

Pa duna e bon ehempel, sr. Harms a dicidi di stop humamento den su negoshi tempo cu e tabata doño di Taco Bell. Y den e nite club cu e tabatin despues, nan no a stop e humamento, ya cu den e caso aki nan a dicidi cu esaki ta un decision individual. Nan tabata acepta solamente hoben adulto di 21 aña pariba pa drenta na su nite club.

Despues di tur e añanan cu a pasa e ta kere cu e decision tabata uno corecto. “Por cierto mi tabata desea pa e lo wordo haci mas stricto”, asina el a señala. Esaki debi cu e empleadonan publico ta haya huma secundario, y ta ser bisa cu esaki ta mas dañino ainda cu ora bo mes huma.

Sr. Harms ta kere cu a rais di su campaña pueblo a wordo conscientisa mas. Su esfuerso a resulta cu nan a stop humamento den tur edificionan publico. E decision aki a hiba cu hopi restaurant tambe a prohibi e humamento den nan luga.

E ta kere cu loke ta pasando na Spaña ta un bon, pasobra hopi hende cu no ta huma no kier bay den un luga caminda e hendenan ta huma libremente. “Nan ta haya e humamento di otro ofensivo pa no bisa cu ta dañino pa nan salud tambe”, segun dr. Harms.

E ta desconoce e resultado di victimanan pa motibo di humamento na Aruba. Sinembargo e ta presumi cu e ta mes malo cu otro paisnan, y den cierto sentido esey ta rekeri enforsamento mas stricto. “Ami personalmente a tuma un decision cu tin

hopi luga cu ami no ta bay pasobra humamento ta wordo permiti”, asina sr. Harms a bisa categoricamente.

E hecho cu por ehempel na Spaña ta wordo prohibi entre otro e humamento cerca di centro medico of institucion hospilario, sr. Clyde Harms ta haya esaki bon. E ta bisa cu na Merca bo no por huma den un area di 50 meter leu di e porta. E ta critico bisando cu akinan na Hospital e hendenan ta para dilanti di e porta di e institucion aki, y nan ta huma y tur e humanan ta bay pa den.

“Den hospital ta prohibi pa huma pero e hendenan ta para pafo cu porta habri tur e humanan ta drenta paden tog”, segun sr Harms.

E ta kere cu esaki ta un situacion cu hospital por haci algo pa enforsa e reglamento mas stricto y exige un distancia di 50 pa 100 meter, y preferiblemente pabou di entrada pa e biento no supla e huma paden.

E idea cu humamento ta wordo prohibi na hopi luga publico na Aruba, esaki ta un progreso p’e, compara cu e situacion cu tabata existi. Ta un lastima cu no ta existi un asociacion di no humado cu lo percura pa limita e consumo di sigaria den luganan publico.

Sinembargo e ta mira cu Gobierno mes ta rekeri cierto mensahe riba e paki di sigarianan, aunke esaki ta un exigencia cu a ser adopta casi mundialmente. E ta kere cu liga di cancer manera Wilhelmina Kankerfonds ta haci hopi propaganda tur aña mustrand e peligernan di humamento pa tur hende.